

Mar. Luther.


Wittenb. 1532.

V^g
1953

30.

Bl. zu Fd 2463 aryl
In Ber. einstell. Rom

12



Auslegung
 D. Mart. Luthers/
 vber das Lied Mose
 am Zwey vnd Dreissigsten
 Cap. Deutero. Vordend-
 schet aus dem La-
 tin / durch

Iustum Jonam.

Gedruckt zu Wittemberg
 im M. D. XXXII.





L. 2, 3925



Vorrede J. Jone.



Als der hohe Prophet

Mose / inn seinem Fünfften bu-
 che / die Zehen gepot / nemlich
 die ersten vnd andern Taffel /
 durch viel edele / trewe / köstliche
 prediget / dem volck hatte einge-
 bildet vnd ausgelegt / wie denn dasselbige
 Fünffte buch / ein recht ausbund ist / vnd ein
 vberans furterffuch / glosa ordinaria / vnd
 Comment / vber die Zehen gepot / Dat er kurtz
 vor seinem tode / dem gantzen volck Israel / vnd
 allen nachkomen / dieses lied zu einem gedecht-
 nis vnd zur letze gelassen / darinne er mit kurtzen
 worten / die summa / des Ersten vnd furnem-
 sten / höchsten gepots / vnsonst aller predigete /
 vormanung vnd drawung / so er lange zeit /
 vom ersten tag seines beruffs vnd eingans bey
 dem grossen volck gethan / gefasset vnd begrif-
 fen hat / Damit sie / solches Erstes / höchsten
 gepot / der ersten Tafeln / Ich bin dein Got etc /
 vnd das gantz Göttlich gesetz / nicht allein von
 Priestern vnd Leniten / alle sieben jar / vnd zu sei-
 ner zeit hören / ausruffen / vorlesen vnd predi-
 gen / sondern das auch die selbige lere / vnterm
 volck / bey jungen vnd alten / inn der gemeine /
 vnd inn heusern / mit teglicher vorinnerung /
 mit teglichem leren / vben vnd vermanen / mit

2 ij teglichem



teglichem singen vnd sagen / getrieben / vnd den
leuten eingeblewet würde.

Wie man itzund noch lieder vnd gesenge
dem gemeinen man / vnd der jugent machet /
darinne die Summa des gantzen Euangelij /
vnd erkentnis Christi begriffen ist. Denn Mo
se / als ein besonder hoher man / hat wol ge
wust / das diese selige lere / nemlich / das recht
Gottes wort / im volck auszubreitten / vnd zue
halten / kein menschlich weisheit / kein erbeit /
keine sorge / mühe / noch vleys / gnug ist / Vnd
das es auch nicht hilfft / das man die bücher
vnd schriffte hat / Wie etliche itzund wenen /
wenn sie allein die bücher haben / so sind sie ge
leret vnd heilig / ja das es nicht hilfft / das das
Deuteronomion inn der lade des bundes / od
der inn der liberey lige / sondern / wenn auch die
prediger / als solcher hoher Prophet / aller ho
hen Propheten / Moses selbs / vnd andere / das
Göttlich wort / mit allem höchsten trewen vleys /
mit lebendiger stimme / vnd teglichem anhal
ten / treiben / Wenn diese Zehen gepot / odder
Göttlichs wort / gleich teglich / jungen vnd al
ten leuten / mit teglichem anregen / mit bitten /
mit flehen / mit locken / mit singen vnd sagen /
mit aller innerlicher vnd eusserlicher vbunge /
wird eingebildet / darff es dennoch grosses ge
lücks / vnd sonderer reicher Gottes gnade / das
es vor so grossen / grimmigen toben vnd wüten
des Teuffels / der es gern zu grund tilgen wolt /
doch bey etlichen haffte vnd bleibe / Vnd durch
falsche

falsche lere vnd andere list des Satans / vnd bosheit der vorzweinelten welt / nicht gantz vergessen / vnd gar vnterdrucket werde.

Vnd so nu Moses als ein hoher man / wilchem so ein vnsaglich grosse burde / des grossen volcks zu regirn / war auffgelegt / kurtz vor seinem absterben / schon inn seinem hertzen / mit den gedancken vmbgieng / wie bald alle das gute / das er angericht hatte / wurde fallen / wie jemmerlich vnd erbermlich es nach seinem tode / vnd weiter hernach / wurde zugehen / wie es ihe lenger ihe erger / inn dem selbigen volck künfftig werden solt / Dat er die grosse treffliche wolthat / so Gott dem volck erzeigt / inn diesem lied / kurtz mit gantz wichtigen Worten / gerüret vnd erholet / Darnach durch das gantz lied / bis zum ende setzet er / als ein rechter scharffer Moses / eitel harte / schreckliche straffwort / vnd grewliche dreyung Göttlichs ernsts vnd zorns.

Vnd wie das feine Sprichwort laitet / Wes das hertz vol ist / gehet der mund vber / sihet man wol / inn diesen Worten / das Moses dieses lied / aus hefftigem / hitzigen Göttlichen eifer geschrieben hat / vnd das dis lied / kurtz vor seinem tode / das trew from hertz / den trefflichen hohen man / manchen schweren betrubten gedancken / manche starcke anfechtung gekost hat / wie wir den sehen werden / Als wenn Itzund ein trewer / fromer prediger / der aus
A ij grund



grund seines hertzens / gern sehe / das Gottes
wort vnterm volck bleiben möchte / vnd auff
die nachkomen reichen / ein liedlin singen solt /
Wie es noch inn dreissig odder viertzig jaren /
wird inn aller welt zugehen / vmb der trefflich-
en / vnsaglichen / grossen vnd anckbarkeit vnd
vorachtung willen / welche itzund Bischoffe
vnd Fürsten / vnd auch Edelleut / bürger / baw-
ern / auff dieser seiten gegen das Göttliche wort
erzeigen / der würde auch nicht viel freude oder
Gaudeamus / sondern viel hertzleid / Requiem /
vnd jamer zu singen finden / Viel mehr hat Mo-
ses grosse angst vnd schmerzen danon gehabt /
welcher hie inn diesem lied prophetzeit / wie es
dem gantzen volck / künfftig vnd vber lange
zeit / wenn sie nu ihre Könige vnd fürsten haben
werden etc / gehen sol / bis das gar mit ihnen
aus sey.

So denn dis lied / nicht allein die Israeli-
ten angehet / sondern auch vns alle / vnd die lie-
ben zarten gesellen / welche itzund inn allen sten-
den Gott den **DEUXI** / mit seinen Zehen ge-
poten vorachten / vnd sagen / Die Pfarrer Kön-
nen nichts anders / denn die Zehen gepot pre-
digen. Dab ich dieses lied / nach der anslegung
D. Martini / deudsch wollen an tag geben / die
gelerten / so ihre Pfarrer mit den Zehen gepoten
vorachten / widder vngelert zu machen / anzu-
zeigen / das Moses die Zehen gepot nicht gerin-
ge achtet / das sie doch sehen / was die Zehen ge-
pot sein / Wer der man ist / der auff dem Berge
Sinai

Sinai/wie Exodiam xix. beschrieben/mit be-
 weisüg Götlicher Majestet/mit grossen schreck-
 lichem feuer/mit starckem blitz vnd donner/
 als einer/der **NEX** sein vnd bleiben wil/sich
 hat sehen vnd hören lassen/ Vnd was grosses
 der gantzen welt / Keiser / Papst / Fürsten /
 Herrn / Königreichen / landen / leuten / an den
 kurtzen Zehen gepoten (welche ein itzlich bawer
 vñ bawerknecht / itzund hören kan/aber gleich-
 wol verachtet/vnd mit füssen tritt) gelegen ist.

Es ist ein grosse/sonderliche Gottes gaf-
 be vnd gnade/das itzund widderümb der Ca-
 techismus rein gelert wird inn der kirchen/nem-
 lich die Zehen gepot/Glaub/vnd Vater vnser/
 Denn dadurch hat ein itzlicher mensch die gan-
 tze Theologia/vnd kan erkennen lernen/was
 der rechte/beste/höchste/warhafftige Gottes
 dienst ist/was Gottes wille vnd gepot ist/was
 er von vns foddert/ Item wie ein jder inn sei-
 nem stand/inn allem wandel vnd leben gegen
 seinem nehisten sich halten sol/vnd leben/das
 es Gott gefalle/ Vnd wenn die Lutherische le-
 re/wilcher der Teuffel so bitterlich feind ist/
 nichts hette anders genutzet/denn das sie den
 Catechismum vnd die Zehen gepot hat widder
 dem volck bekant gemacht/wilche vnter dem
 Papstum gegen den walfärten/gegen der lere
 von Müncherey vnd Messe hören etc/musste die
 geringste lare sein / so hette sie doch mehr inn
 der Christlichen Kirchen gebawet/denn Paris
 vnd

vnd alle hohe Schulen / so lange sie auff erden
gewest / Aber die schendliche welt / ist allenthal-
ben vndanckbar vnd vorkeret / beide gegen Got-
tes gepoten / vnd gegen dem Euangelio / Dö-
ret sie gepot / so kan sie nicht dencken / wie gros
der gebieter ist / bis das sie blitz vnd donner fü-
let / entwer leiplich / oder im gewissen geistlich /
Vorkündiget man ihr denn gnade vnd barm-
hertzigkeit / so kan sie aber ihr nicht schencken
lassen / sondern wil mit ihren eigen wercken /
Got gnade ab verdienen.

Also wenn man den leuten die Zehen ge-
pot prediget / dencken sie nicht / das Gott mit
den gepoten so grosser ernst ist / vnd das sie alle
die grösten sachen / die im himel vnd erden / inn
dieser vnd ihener welt sein / belangen / Denn die
Erste tafel belanget ihe Gott selbs / seine Gott-
heit / sein Götliche ehre / wilche ihm Engel vnd
menschen schuldig sein / Die ander tafel / belan-
get aber die gröste sachen / die vnter dem himel
auff erden sein / alle Politien vnd regiment / alle
haushaltung / alle hendel vnd werbung / Vnd
ist also kein weisheit / kein leben odder wesen /
das nicht inn die gepot gefasset sey / Viel aber /
wenn sie die Zehen gepot hören nennen / denck-
en an der kinder Bibel / meinen es sey schlecht
kinder predigt / dencken nicht / das es so gantz
hohe grosse gepot / vnd das hinter den / so ein
grosser DEXX / so ein hohe Maiestet / so ein
hoher gebieter ist. Aber wir wissen / Gott lob /
das

Das die Zehen gepot hören vnd lernen/ Item/
 wissen was gesetz/ was Euangelion/ was ge-
 pot/ was verheissüg ist/ nicht so ein schlecht kin-
 der lere zu achten/ sondern sein die höchste zwö-
 lere vnter der Sonnen/ on wilche niemands zu
 Gott komē/ oder die warheit erkennē mag. Von
 dem Euangelio zu reden/ wollen wir auff das
 mal lassen anstehen/ Aber wenn du die Zehen
 gepot hörest nennen/ darffest du nicht mit dei-
 nen gedanckē in der kinder Fibel faren/ oder an-
 sehen/ das es Kurtze wort. x. sein/ wilche inn an-
 dern Kinderbüchern auch geschrieben stehen/
 wilche man teglich höret/ Sondern magst wol
 höher faren/ vnd wissen/ das du ein lere hörest/
 sonderlich im Erstē gepot/ Ich bin dein Got 2c.
 Du solt nicht andere Götter haben/ die noch
 kein Prophet/ auch Moses selbst/ kein Apostel/
 ja kein Engel im himel/ ausgelernt odder aus-
 gestudiret hat/ Denn das ein arme creatur/ ein
 armer mensch/ die hohen Maiestet/ wilche hi-
 mel vnd erden/ Engel vnd menschen geschaf-
 fen hat / warlich fur ihren herrn vnd Gott
 halte/ sich alles guts zu ihm versehe/ sich auff
 ihn wage inn leben vnd sterben/ ist nicht ein
 kunst/ die man kan aus studieren/ So hat auch
 kein heilige auff erden ihe gelebt/ auch nicht Jo-
 hannes Baptista/ der sie aus studirt habe/
 Darumb sagt auch der Herr Christus Matth.
 am xxij. das inn den zweien gepoten das gantz
 gesetz hanget/ vnd alle Propheten/ Denn im
 Ersten gepot / ist alles begriffen / was Gottes
 B ehre

ehre / seine Gottheit / seinen heiligen namen /
seinen heiligen willen / vnd den höchsten / heilig
sten Gottes dienst angehet / Darumb alle Cere
monien / alles geistlich leben / aller Gottes di
enst / sie sind vnter Christen odder Weiden / sol
len vnd müssen sich durch das erst gepot vrteilen
vñ richten lassen / also / das / wo sie dem gemes
sind / so sind sie Gott recht wolgefellig / Sind
sie dem gepot vngemes / so sind sie Abgöttisch /
Teuffelisch vnd eitel greuel für Got.

Also im andern gepot / liebe den nechsten /
odder inn der andern Tafeln sind begriffen / alle
rechte Göttliche / Christliche gute werck / die
inn aller welt / von jungen odder alten / inn was
stand sie sind / jmer geschēhē mügen / sollen auch
vnd müssen durch die ander Tafel / sich vrteilen
vnd richten lassen / Vnd die viel von guten wer
cken schreien / aber dieses grösste Register / da die
guten werck erzelet werden / mit füßen treten /
ehebruch / mord / dieberey on vnterlas treiben /
mügen sich wol spiegeln inn der andern Taffel.

Denn alle andere gute werck / ob sie wol
gros scheinen vnd gleiffen / wenn sie den gepo
ten der andern Taffeln nicht gemes sind / vnd
im gehorsam Gottes / nach dem Ersten gepot /
geschehen / sind es eitel heuchlische wercke / der
Got nicht achtet / vnd dem nechsten nichts nütze
sind / So ist es nu alles / was Gott vnd den ne
chsten belanget / inn die Zehen gepot gefasset /
Vnd aller Propheten bücher / auch viel Psal
men

men/sind eitel prediget/verinnerung vnd ans-
 legung/mit mehrern vnd reichern Worten des
 Ersten gepots/Ich bin dein Gott etc/ Item
 alle Historien im Josua/im buch der Richter/
 der Könige/der Cronicken/sind Exempel/wie
 Gott so fest vber dem Ersten gepot gehalten
 hat/wie er die vnglebigen vnd gottlosen ge-
 strafft/vnd wie er die giebigen errettet vnd ge-
 tröstet hat.

Aber also gros ist die list vnd bosheit des
 Teuffels/das er die heiligkeit vnd Gottes dienst/
 welche fur der welt den größten rhum vñ schein
 haben/als die vnzelichen satzungen vnd Mön-
 chereien/vnter dem Papst vnd Türcken/Kan-
 anrichten/das jederman/odder das mehrerteil
 darauff fellet/vnd die rechten gepot Gottes/
 sonderlich das Erst/nicht allein lesset anstehen/
 sondern mit füßen tritt.

Also ist vnter dem Papstumb kein toller
 Mönchs traum gewesen/keine lügen vñ Rosen-
 krentzen/so vnuerschampt/sie ist hefftiger mit
 leren vnd predigen/mit Worten vnd wercken
 getrieben denn die heiligen Zehen gepot/Vnd
 das höchste/heilige vornemste gepot/wilchs
 den höchsten/reinisten/furnemisten Gottes
 dienst foddert/das wir Gott von hertzen gien-
 ben sollen/ihn fürchten etc/Darumb so nu
 Mose wol wuste/das im volcke Israel auch al-
 lerley heuchler würden auffstehen/dem Gottes
 dienst Baal/vnd andern falschen Gottes dien-
 sten anhangen/von diesen geboten abweichen/
 vnd das erst gepot inn wind schlagen/ So hat

B ij er ihn

er ihn dieses Lied zur letze gelassen / darinne er
ihn mit Kurtzen / aber gantz hefftigen Worten /
drawet / das ihn hernach alle Propheten auch
gedrawet haben / wilehs ihn auch also widder
faren ist / das beide / himel vnd erden zeugen
müssen / es hab kein titel gefehlet / es sey alles
war worden.

Vnd inn diesem Lied werden wir nu sehen /
das Gott mit den Zehen gepoten kein schertz
wil haben / sondern wie gering vnd schwach sie
scheinen / wie wenig sie von gewaltigen / von
reichen / von weisen / von den falschen heiligen
geacht sein / so sollen sie doch im himel vnd er
den regieren / alle andere gepot vnd lere / so
den weg der seligkeit wollen weisen / alle falche
heiligkeit vñ ketzereien / verdammen / königreich
vnd fürstentumb umbstossen vnd auffrichten /
Wie sie denn am königreich Israel vnd Juda /
beweiset haben / vnd noch teglich beweisen mit
vielen exempeln.

Denn ob es die welt nicht glaubet / vnd
inn sicherheit vnd blindheit Gott mit seinen ges
poten verachtet / so feret Got der **DEUX** gleich
wol fort / erzeigt das er **DEUX** vnd Gott ist /
tröstet vnd errettet seine fromen kinder / erzeigt
ihn reiche güte vñ gnade / wiewol vnter allerley
Creutz vnd trübsal / Widderumb plaget /
straffet / tilget vnd stürtzet entlich die gotlosen /
wie das Erst gepot lautet / vnd wie Psalmen da
von singen / wie inn allen Historien / beide der
schriffte vnd der Weiden / zusehen ist / Das wer
den wir inn diesem Lied weiter hören vnd lesen.
Das Lied

350

Das Lied Mose

Deutero. XXXII.



Ist diesem Besange
odder Lied (wiewol er zur letze
billich freuntlich reden solt) brau-
chet der Prophet Mose nicht
viel sanffter / gelinder wort / son-
dern redet alles daher / mit eitelm
grossen trefflichem harten ernst / schilt / draw-
et vnd straffet auffss schwindest / erzeiget eitel
hertigkeit vnd scherffe / Vnd erstlich wirfft er
dem vndanckbarn volck für / Gottes vnzeliche /
grosmechtige leipliche vnd geistliche wolthat /
stellet ihn die selbigen für die augen / das sie es
greiffen mügen / Widderumb malet ers ihn
auch für die augen / ihre feine danckbarkeit /
wilche sie vnd ihre nachkomen / dem fromen
trewen Gott beweisen werden / nemlich / das sie
alle grosser wolthat / vnd Gottes selbs / verges-
sen werden / sich abkeren zu frembden göttern /
vnd derhalben grenlichen Gottes zorn vnd ver-
maledung auff sich laden / Vnd Moses thut
hie / wie ein rechter Moses vnd gesetzprediger /
das er nicht viel veterlich locket / sondern schilt
straffet / eiffert vnd zürnet / vber ihrer grossen vn-
danckbarkeit / redet eitel brennende / feurige
wort / drawet allenthalben mit einem almechtis-
gen starcken Got / des henden niemands entge-
B iij hen

hen noch entfliehen werde/ Damit zeigt er an/
die art des gesetzes / nemlich / das es die funde
zeigt / das gewissen erschreckt / Vnd das one
gnade vnd barmhertzigkeit durchs gesetzte nie-
mand fur Gott kan from werden / das auch
nicht zu wagen sey mit einer solchen grossen
Majestet / durch vnser betlische elende wercke
zu handeln / odder dem feuer mit strohelmern
zu begegen.

WErcket auff ihr himel / ich
wil reden / vnd die erde hore die rede
meines mundes.

Er ruffet himel vnd erden / vnd alle Crea-
turn an / zu zeugen / als inn einer grossen sache /
wilche nicht zeitliche güter / nicht ein königreich
odder fürstentumb / nicht ein haus / hoff / gold
odder silber / sondern ein itzlichen das höchste
vnd beste belanget / nemlich Gott / den brunn als
les guten / mit allem ewigen vnd zeitlichem heil /
mit himel vnd erden vnd allen Creaturen / ent-
wer zu haben / odder ewig (wilchs schrecklich
ist) zu verlieren vnd zu entperen / Ja wilche sache
nicht belanget den Keiser / nicht Fürsten odder
herrn zu uersünen / sondern Gott die ewige Ma-
iestet gnedig zu haben / hie vnd dort wol zufa-
ren / odder inn Gottes vngnaden / inn ewigem
verzagen / an allen Göttlichen vnd menschlich
en trost / one alle hülff odder rettunge / ewig
vnd one vnterlas zu sterben vnd verderben. Inn
solcher grossen sache / solt nach wol klein zeng-
nis oder kleine zeugen zu wenig sein / da müsten
nach

noch wol her tretten / der schöne hohe weite himel / mit der edelen Sonne / mit dem Mon / mit allen sternem / Da müste noch wol die erde mit alle ihrem gewechsse / mit allen vogeln / mit allen thieren komen / Vnd das grosse weite Meer mit alle seinen fischen / vnd alles was sich darinne reget / vnd ihrem Gott / widder die gotlosen zeugnis geben / seine ewige Göttliche ehr; vnd gerechtigkeit erretten / vnd sein vrteil bestetigen.

Das gehet auch also / wenn das stündlin kömpt / das Gott der **WELKE** widder die veracher auffwachet / vnd sich nimer wil vergessen odder verachten lassen / entpfellet ihn plötzlich alle ihr mut / werden inn ihrem hertzen vnd gewissen so gantz verstürtzt / blöde / trawrig vnd verzagt / das sie nicht anders fülen / denn das nicht allein Gott / sondern himel / erden / laub vnd gras / alle Creauren mit ihn zörnen / sie vberzeugen / anklagen vnd verdamnen. Also drawet der Prophet **Dabacuk** dem könige zu **Babylon** / da er sagt am .ij. Cap. Denn auch die steine inn der mauren werden schreien / vnd die balcken am gesperre werden ihm antworten / das ist / wenn Gott ihn werde heimsuchen / solle er so ein verzagten mut kriegen / wenn ein bred an der wand knacket / das er dencke / der himel wölle fallen / Also drawet auch **Mose** am **xxvj.** den gottlosen / das sie Gott werde so verzagt machen / das sie sol ein rauschend blat sagen etc / Dergleichen aber sehen wir **Esai** am .j. Cap. das er dem **Mose** nach / vber die vndanckbarkeit

barkeit des halsstarrigen gotlosen bösen volcks/
himmel vnd erden anruffet/ ja sie werden auch
allzu starck zu seiner zeit zeugen.

Meine lere trieffe wie der re-
gen/ vnd meine rede wie der tau.

Wie der regen auff das gras/ vnd wie die
tropffen auff das kraut.

Es wünschet hie Mose/ das seine lere mü-
ge trieffen wie der regen vnd tau auff das gras
vnd kraut / das ist/ das sie müge kressftig sein
vnd frucht bringen/ das er nicht inn wind rede
vnd predige/ Nach dem er von der aller grösten
sachen auff erden redet/ vom handel der Religi-
on/ nemlich vom ersten höchsten gepot Got-
tes/ was die rechte Religion / was der höchste
vnd trefflichste Gottes dienst ist/ Vnd widder-
umb / was der höchste gewel fur Gott sey /
nemlich falsche lere/ falscher Gottes dienst/ fal-
sche heiligkeit / allerley heucheley/ wilchs alles
stracks widder das erste höchste gepot Gottes
gehet/ wilche heucheley Mose nennet eitel ottern
vnd drachen giffit vñ gall/ So wünschet er nu
das diese seine rechte lere/ bey vielen müge frucht
schaffen/ Gottes wort vergleicht er regen vnd
tau/ denn wo es rein gepredigt wird / da ist
nicht wie menschliche satzung / one nutz odder
frucht/ wilche Petrus/ wolcken one regen nen-
net/ sondern wircket vnd schafft etwas grosses/
Die zuhörer vergleicht er dem gras vnd kraut/
denn wie regen vnd tau die wiesen lustig vnd
grün machen/ das blumen vnd gras nach aller
lust

352
lust / nach allem wunsch auffgehen / vnd
wachsen / also erquicket Gottes wort die hertzen
vnd gewissen / Vnd wo der selbige regen
Göttlichs worts hinfellet / da gehets one besse-
rung vnd frucht nicht abe.

Denn ich wil den namen

des **DEXXI** anruffen / Last vn-
serm Gott die herligkeit.

Das ist / Ich wil ein liedlin singen / das
wil ich hoch anfahen / vnd höher sol es nie-
mands vnter der sonnen anfahen noch besser
machen können / Mein bestes lied vnd beste le-
re sol sein das erste gebot Gottes / nemlich / das
man dem einigen waren Gott / die ehre geben
sol / ihnen hertzlich fürchten vnd lieben / auff
ihnen allein trawen vnd bawen / vnd das alle
andere Gottes dienste / wie heilig / trefflich /
vnd köstlich sie scheinen / so anffer / odder neben
dem ersten gebot werden angericht / eitel Ab-
götterey vnd heuchley sein / Vnd lautet mein
lied also / Gebet Gott die herligkeit / das ist /
Dem einigen / waren / lebendigē Gott / gebürt
alleine die herligkeit / lob vnd preis / inn hi-
mel vnd auff erden / Er ist allein (wie Moses
sagt / inn diesem fünfften buch) ein Gott vber
alle Götter / ein Herr aller Herrn / der himel vñ
erden / vnd das Meer geschaffen hat / vnd als
les was darinne ist / der alle Königreiche auff
erden inn der hand hat / die selbigen auffrich-
tet / vnd

let / vnd nidderstößet wie er wil / der allen mens-
schen auff erden odem vnd leben gibt / der als-
ler Könige hertzen / synne vnd gedanken / vñ
sonst aller menschen auff erden inwendig bil-
det vnd lencket / wie es ihm gefellet / der allein
alle leibliche vnd geistliche gaben gibt / one wil-
chen niemands leib / leben / weisheit / stercke /
gesundheit / gewalt / reichthumb / odder eini-
ges gut haben / odder einen augenblick behal-
ten kan / Dem / spricht Moses / gebt die her-
ligkeit / das ist / ihnen erkennet vor ein Derrn /
der alles schafft vnd wirckt / von dem allein al-
le gaben herflissen / also sagt auch Hieremias
am. ix. Ein weiser rhüme sich nicht seiner weis-
heit / ein starcker rhüme sich nicht seiner ster-
cke / ein reicher rhüme sich nicht seines reich-
thumbs / sondern wer sich rhümen wil / der
rhüme sich des / das er nicht wisse vnd kenne /
das ich der Derr bin etc.

Die ist nu beschlossen / das keins mensche
die herligkeit ist / sondern alle hoheit / alle Maie-
stet / gewalt vñ macht / ist allein Gottes / der gibt
allein weisheit / stercke / reichthümer / wenn er
wil / nimpts auch widderumb weg / vnd en-
derts mit allen menschen wie er wil / Darumb
kan kein Königreich lenger stehen denn er wil /
kein regiment / kein haushaltung / kein reich-
thumb odder wolffart lenger weren odder blei-
ben denn er wil / wie denn Daniel sagt / Er-
richtet Königreiche auff / vnd stößet sie zu bo-
dem wie er wil / das nu also erkennen vnd wisse-
sen / ihm

sen/ ihm alleine alle ehre heimweisen/ ernstlich
 von ihm alle gaben leiplich/ geistlich alle hülff/
 vnd trost warten/ auff ihnen inn glück vnd vn-
 glück/ inn leben vnd sterben/ sich von hertzen
 verlassen/ zu ihm inn allen anfechtungen flie-
 hen/ ihnen allein inn allen nöten vnd trübsaln
 suchen vnd anruffen/ das ist der höchste/ an-
 genemeste Gottes dienst.

Die herligkeit aber gebe Gott dem Herrn
 allein/ der kleine hauffe/ die glaubigen vnd fro-
 men auff erden / die selbigen vertrauen vnd
 bawen auff ihnen von hertzen/ erkennen das
 sie alle güter von ihm haben / das sie kein au-
 genblick fur dem Teuffel bleiben köndten /
 wenn Gott sie nicht schützet/ vñ behütet/ Die
 heuchler aber/ vnd alle andere Gottlosen / ob
 sie wol mit dem munde Gottes allmechtigkeit
 vnd herligkeit bekennen / so verlassen sie sich
 doch im hertzen auff ihre eigene heiligkeit /
 weisheit / stercke / vermügen / auff ihre eigene
 wercke/ auff menschen hülffe vnd trost / vnd
 wenn sie inn nöten der selbigen nimer entpfün-
 den/ so erschrecken sie/ verzagen vnd verzwei-
 ueln / lauffen von Gott / lestern vnd fluchen
 Gott/ Dieses ist aber ein starcker trost den fro-
 men vnd glaubigen/ ob sie wol teglich inn der
 welt sehen / das Gottes wort vnd werck / so
 schentlich verspottet / verächet / verachtet /
 vnd mit füßen getretten werden/ das sie dens
 noch vor war wissen / das es mag ein zeitlang
 weren / es mag ein augenblick Gott den ver-

C ij echter

echter zusehen / aber entlich erfahren sie / das
dis erste gebot war bleibt / vnd die macht vnd
herligkeit Gott behelt / wie man itzund sicht /
das klein vnd gros / one Gottes fürcht / one
schew / geitzen / Gottes wort / vnd die fromen
trewē prediger verachten / vnd die Zehen gebot
als ein geringe lare in wind schlahē / wissen aber
nicht / das entlich dis erst gebot wird war blei-
ben / vnd das sie itzund nicht glauben wollen /
das werden sie inn ihren gewissen an leib vnd
seel / an ehr vnd gut / weib vnd kindern / erfahren
müssen .

Darumb / wenn man Gott die herligkeit
lesset / alle hülffe vnd trost bey ihm suchet / vnd
von ihm wartet / da hat er segen vnd gnade zu-
gesaget / da gehet es auch wol / Es sey inn kir-
chensachen odder predigampt / es sey inn res-
gimenten / inn haushaltung / Kleinen odder
grossen hendeln / Das sehen wir / wo ein fro-
mer / trewer Bischoff vnd Pfarrer ist / der nicht
eigene ehre suchet / sondern erkent / das er den
geist / gnade / das wort / vnd alle gaben von
Gott hat / da ist Gott selber Bischoff vnd
Pfarrer mit / Widderumb / wo ketzer vnd fals-
sche lerer / Gott die ehre rauben / vnd ihr eigen
ehre suchen / da gehets wie wir zu vnser zeit an
Thoma Müntzer / vnd andern mehr / gesehen
vnd erfahren haben / Also auch inn regimenten /
wo Gottforchtige oberkeit ist / die Gott vor au-
gen helt / ihm die herligkeit lesset / da sitzet Gott
selbst mit inn Ketzen / hilfft mit zusehen / was
chen vnd

chen vnd regiren / widderumb / wo die Könige / Fürsten vnd herrn Gottes vergessen / rauben Gotte sein ehre / bawen auff ihr eigen anschlege vnd weisheit / auff reichthumb vnd gewalt / auff bündnis / verstentnis / vñ menschen hülffe / da gehet doch alles zurücke / da ist doch kein glück noch segen / wie die erfahrung gibt / wie der Heiden vnd Bibel Historien anzeigen. Ob aber vnser Herr Gott / etwan den Gottlosen / etliche böse anschlege / Gottlose Kette / vnd gedancken lesset fortgehen / das es scheinet / sie thun was sie wollen / sie machens wie sie es gelüst / vnd ihr sey die herligkeit / vnd gewalt / Gott thue nichts dazu / so nimpts doch ein böses ende zuletzt / wie der .lxxij. Psalm sagt / Sie gehen vnter / vnd nemen ein ende blötzlich vnd mit schrecken.

On wandel sind die werck
des felsen / den alle seine wege sind gerichte.
Trew ist Gott vnd kein böses an ihm /
Gerecht vnd redlich ist er.

Er nennet mit einem fast feinen tröstlichen titel Gott ein felsen / das er ein recht starker gewisser trost ist / aller die sich auff ihnen verlassen vnd frölich wagen / Alle andere hülff vnd trost / ist ein vngewisser sandgrund / das findet sich in der erfahrung / aber wer auff Gott sich hertzlich verlesset / der kan inn allen anfechtungen bestehen / Also sagt auch David im
C iij Psalm

Psalm / Mein fels / mein burgk / mein hort dar
auff ich trawe / Item / bey Gott ist mein heil /
mein ehre / Der fels / meiner stercke / Mein zu
uersicht ist auff Gott / Seine wercke sind one
wandel vnd volkomen / Er redet von den wer
cken Gottes / wilche Gott wircket inn allen
glaubigen hertzen / vnd inn allen so Gott recht
fürchten vnd lieben / Denn wenn die hertzen
durch den glauben gereiniget vnd geheiliget
werden / so ist da kein heucheley / sondern ist
rechte volkomene heiligkeit vnd reinigkeit / vnd
eitel rechter / heiliger Gottes dienst / also das
das hertz Gott recht erkennet / ihnen gros
acht / hertzlich fürcht vnd liebet / ihm auch
vor so vnzeliche woltat dancket / vnd inn allen
nöten anruffet / vnd die wercke so Gott inn vns
wircket / heldet er gegen vnser eigen wercke / da
wir durch wercke / von vns selbs ertichtet od
der durch vnser eigen treume / Gotte wollen ein
Gottes dienste / nach vnserm gutdünckel an
richten / wilchen er ihm sol gefallen lassen /
aber durch wilchen wir vns / von Got zu fremb
den Göttern abwenden / als ist gewesen Mön
cherey / Item / die Messen / vnd der gleichen
vnterm Papstumb / Das sind nicht wercke
one wandel / sondern heuchelische vnuolkomene
verdampfte wercke.

Weiter sagt er / Alle seine wege sind ge
richte / alles leben vnd wandel der glaubigen
ist rechtschaffen / gehet nach Gottes befehl
vnd wort / nach den heiligen Zehen geboten /
nicht

nicht inn menschlichen trennen odder gut
 dünckel / Also ist Gott trew / gerecht / redlich.
 Das redet er alles von Gott / auff die weis /
 das er antzeige / was Gott im ersten gebot fodert /
 Denn er wil / das wir ihnen vor ein trewen
 en / rechten / gütigen Gott / der es veterlich
 meinet achten vnd halten sollen (denn hie
 redet er nicht von Göttlicher natur odder wes
 sen) sondern redet danon / wo fur man Gott
 halten / was man von ihm im hertzen glauben
 sol / Wil also mit diesen Worten / die falschen
 Götter / vnd alle abgöttische gewel gerüret ha
 ben / als solt er sagen / wer dem Gott warlich
 dienet / nemlich / das er ihm (wie das erst ge
 bot lautet) hertzlich vertrawet / vnd ihnen
 fürchtet / der ist alle seiner sachen gewis / der
 bauet nicht auff sich selbs / noch auff seine
 wercke / sondern auff Gottes wort vnd zusage /
 die nicht wancken noch feilen kan / da ist das
 hertz zu Friden mit Gott / da kan das gewissen
 frölich vnd stille sein.

Das ist der rechte / höchste / heiligste Got
 tes dienst / da ist kein falsch / kein lüge noch
 heuchley an / sondern das hertz inwendig ist
 durch den glauben heilig vnd rein / Darumb
 sind auch den reinen alle andere eusserlich wer
 cke / vnd wandel heilig vnd rein / Widderumb
 an allen andern Gottes diensten / wie köstlich
 sie scheinen / die ansserhalb der ersten Taffeln /
 one glauben / vnd Gottes fürcht / mit allerley
 eusserlichen geberden zugehen / da ist eitel vn
 gewisheit.

gewisheit / eitel mühe vnd erbeit / hertzleid vnd
jamer der gewissen / da bleiben die hertzen vnd
gewissen allzeit inn zweifel / vnd können nim-
mer zu ruhen komen / da bleibt innwendig das
hertz vol blindheit / vol vnglaubens / darumb
sind auch die eusserlichen werck / damit man
wil die seligkeit verdienen / wie heilig sie schei-
nen / eitel greuel / eitel vnflat vnd kot / vor Gott.

Die verkerete vnd verrück-

te art / hats mit ihm verterbet / Vnd
sind nicht seine kinder vmb ihrs thad-
dels willen.

Es propheceiet hie Moses / wie es nach
seinem tode gehen werde / das sie werden leicht-
lich von Gottes befehl vnd geboten abfallen /
die Zehen gebot verachten / nach ihrem dün-
ckel Gottes dienst anrichten / das erst gebot mit
füssen trettē / wie alle heuchler thun / vñ ein vn-
schlachtige bösehebrecherische art werdē / da-
rumb so werden sie als denn auch nicht mehr
liebe kinder / noch Gottes volck sein / ob sie wol
den namen füreten / sondern Gottes feinde
vnd hur kinder / ehebrecher vnd ehebrecherin /
vmb der geistlichen hurerey willen / die sie treis-
ben werden / Also sagt er kurtz vor diesem ges-
sang im. xxix. Cap. Ich weis das ihrs nach
meinem tode verderben werdet / vnd aus dem
wege tretten / den ich gepoten habe / so wird
euch denn vnglück beegen.

Danckestu

Danckestu also dem **H E R**

R E N deinem Gott? Du herricht
vnd vnweises volck?

Ist er nicht dein Vater vnd dein **H E R R**?

Wat er dich nicht gemacht vnd be-
reitet?

Die entbrennet nu gantz / der hohe Pro-
phet Moses / so er ansihet die vnaussprechli-
chen gute / vnd vnzeliche wolthat Gottes / vñ
dagegen die grossen vndanckbarkeit / vnd
schendliche verachtung / vnd sagt / Ist das der
danck / das euch Gott hat zu eigen lieben kin-
dern angenommen / das er euch mitten aus dem
tode heraus gerissen / aus Egypten gefüret /
aus den henden Pharaons gewaltiglich erlöset
hat / vor ewern augen das schilff Meer lassen
stehen wie mauren / euch mit himelbrod gespei-
set inn der wüsten etc. Als solt er sagen / Vor das
alles / das Gott gerecht / trew / gütig vnd al-
lenthalben ein gnediger vater ist / das er euch
fur allen andern Weiden / völcern vnd Kö-
nigreichen auff erden erwelet hat / vmb ewern
willen den König Pharaonen ersenffet / die
Königreich Canaan eingenomen / Item / das
er so lange zeit euch nichts hat mangeln las-
sen / sondern euch / wie ein vater odder mutter
ihr kind auff den henden getragen / allenthal-
ben geschützet vnd behütet / Werdet ihr vnd
ewere nachkomen ihnen also bezalen? mit so
feinem danck begegnen? das ihr allerley Abgöt

D tische



rische/nerrichte Gottes dienst/werdet höher
achten/denn das erst gebot Gottes/Denn die
erste Taffel/da er foddert/Man solle ihnen
für ein Gott halten/auff ihnen allein bauen
vnd trawen/denn ihr werdet abtrünnige hur-
kinder werden/die auff ihr eigen wercke/auff
götzen dienst/auff menschen gunst/hülffe/
trost/auff gold vñ silber werdet können hoffen
vnd vertrauen/allein auff Gott nicht/den
werdet ihr leicht achten/als sey kein hülff noch
rath bey ihm/als sey an ihm gar nichts ge-
legen/darumb werdet ihr auch nicht söne des
vaters sein/sondern ein nerrichte vnweises
volck/das hülffe suchen wird da kein hülffe ist/
Das mag man vns dieser zeit des Euangelij
auch wol sagen/ist das der danck/das ihr
vom Papstumb vnd vnzelichen beschwerun-
gen erlöset seid etc.

Bedenck an die vorige ta-
ge/Merck auff die jar der vorigen
zeiten.

Frage deinen vater/der wird dir verkün-
digen/Deine Eltesten/die werden
dir sagen.

Da hebt er nu an vnd zelet/wie aus ei-
nem Register her/die wolthat Gottes/vñ hebt
an/ander ersten/das Gott dieses volck für al-
len andern Weiden erwelet hat/das Gott so
viel vnzeliche wolthat dem volck gethan hat/
Darumb

Darumb sagt er / frage deinen vater / das ist /
 frage deine veter / vnd deine Eltesten / als solt er
 sagen / Wirstu Abraham / Isaac vnd Jacob
 ansehen / so wirstu vnzeliche wolthat finden /
 wie Gott deine veter geliebet / wie trewlich er
 sich ihr hat angenommen / Solche verinnerung
 ist vns wol von nöten / Denn der art sein
 Adams Kinder / wenn ein wolthat fur vber ist /
 so ist sie bald vergessen / wie zu vnser zeit die er-
 farung gibt.

Da der aller höbest die völ-
 cker ansteilet / Vnd austrewet der
 menschen Kinder.

Da setzt er die grentzen der vöcker /
 Nach der zal der Kinder Israel.

Die erste wolthat ist das / Wiewol Gott
 der **D E X** kein Gott ist aller Weiden / aller
 vöcker vnd Königreiche auff erden / wilche er
 alle geschaffen hat / einem jedem volck auch
 seine grentzen vnd mas ansteilet / wie im ersten
 buch Mose am. xj. Capitel geschriben stehet /
 vnd wie Paulus auch Act. am xvij. gedencet /
 So hat er doch vnter den allen kein volck er-
 welet / da er seinen Gottes dienst hett ange-
 richt / des Gott vnd hausvater er sich nennet /
 als das volck Israel / Vnd ist warlich ein treff-
 liche grosse wolthat / preis vnd rhum / das die
 hohe Maiestet / sich nirgent wil predigen / er-
 kennen / finden / noch antreffen lassen / denn

D ij allein

allein inn Israel / Vnd das vnter so viel Rönigreichen vnd landen / nirgent sol Gottes erkentnis sein / denn allein inn dem volck / vnd das er alle ander Rönigreiche / lender vñ grenzen / also abgescheiden hat / das nicht weiter Gottes volck / irgent leute auff erden heissen sollen / denn allein so weit Israel wonet / vnd ihr land reichet / die andern alle sollen Gottlose Heiden heissen.

Denn des H E R R A
teil ist sein volck / Jacob ist die schnur
seins erbes.

Das ist / weiter reichet Gottes volck nicht / denn Jacob vnd Israel ist / Mit den worten wil er anzeigen / wie gar liebe kinder / wie gar ein heiliges / angenehmes / auserweldes volck / sie für allen andern Heiden sein.

Er fand ihn inn der wüsten /
Inn der durren einöde da es heulet.

Er füret ihn vmb vnd gab ihm verstand / Er behütet ihn wie ein augapffel.

Das ist / Er hat dem volck auff dem berge Sinai sein geseze gegeben / hat mit ihnen ein bund gemacht / das er wil ihr Gott sey / hat sie auch vierzig jar inn der wüsten / so wunderlich gefurt / erhalten / vnd erneeret / ans
so viel.

so viel nöten / angst vnd ferligkeit erlöset / ihren
schendlichen vnglauben / ihr vngedult vnd
murren / ihnen so offft zu gut gehalten / ihr sun-
de vnd halstarrige hertigkeit / ihnen so offft ver-
geben / hat sie wie ein augapffel behütet / trotz
der ihnen leids thete / hat sie für allem vbel /
jamer vnd vnglück / durch seinen Engel schuz-
tzen vnd bewaren lassen / also / das sie an nich-
tes mangel gehabt. Das ist nu die andere /
vñ ein fast grosse wolthat / wer vnter vns auch
bedenckt / wie vns Gott von jugent auff so
wunderlich füret / so gnediglich erneret / für alle
lem vbel / wie ein angeapffel behütet / der wird
auch finden / wie vndanckbar wir sein.

Wie ein Adeler auffwecke

sein nest / Vnd vber seinen jungen
schwebet.

Er breittet seine fittig aus / Vnd nam
ihn vnd trug ihn auff seinen flü-
geln.

Mit den Worten zeigt er an / wie er inn der
wüsten sie geduldet vnd getragen hat. Man
sagt vnd die natur kündigen / als Plinius /
Aristoteles vnd andere schreiben / das mancher
ley Adeler sein / die beste art aber pflegt seine
jungen mit den flügeln zuschlahen / vnd was-
cker zu machen / das sie fligen lernen / auch ge-
gen der sonnen glantz zuhalten / vnd welche
nicht gleich inn die sonnen sehen / werffen sie

D iij aus dem

aus dem nest / als ein vnart / also wil Moses sa-
gen / Gott der Herr hat dich vnter seinen flü-
geln gehalten / ausgeheckt wie im nest / vnd
dich fligen gelernt / wie ein Adeler seine jungen /
Denn er hat es beide mit wolthat vnd straffe
versuchet dich dahin zu brengen / das du fligen
lernest / das ist / ihm vertrauen vnd gleuben /
wie wir im achten Capitel gesehen haben.

Der HERR alleine leitet
ihn / Vnd war kein frembder Gott
mit ihm.

Das ist / vnter Mose ging der recht wa-
re Gottes dienst im schwang / da prediget / re-
det vnd leret Gott selbs vnter ihnen / durch
den Mosen / da hilt Gott selbs haus / war na-
he bey / vnd vnter dem volck / die andern Wei-
den lies er ihr irrige wege im finsternis gehen.
Also itzund so die Zehen gebot geprediget wer-
den / vnd das Euangelion geleret / lere
Gott auch selbst vnter vns / grüßet vns freund-
lich gung / wenn wir ihm allein dancken könd-
ten / vor ist eitel falsche lere vnd irthumb ge-
west / dazu so füret er auch enfferlich das volck
selbst / vnd gab ihnen selbst gros / starck /
sieher geleit / durch öffentliche Göttliche zeis-
chen / des tages durch ein wolken / des nachts
durch ein fenrige seulen.

Er

**Er lies ihn hoch her faren/
auff erden/ Vnd etzet ihn mit dem
einkomen des ackers.**

**Vnd lies ihn honig saugen aus den fels
sen / Vnd öle aus den harten stei
nen.**

Die dritte wolthat zeigt er da an / nemlich
das Gott hat vmb ihrent willen / aus dem
land Canaan / die Weiden vnd ihr Könige ver
trieben / vnd sie inn einem herlichen / köstlichen
guten lande wonen lassen / da sie vol auff / vñ al
les gnug reichlich gehabt. Das er aber sagt / Er
lies sie honig saugen / aus den felsen / vnd öle
aus den harten steinen / braucht er solcher fi
gurn / anzuzeigen / das Gott ihnen allerley reis
chen segen / am gewechse / an narung vnd
früchten inn den landen geben hat / also / das
wo auch nicht gute feiste awen / wo gleich
nicht ecker odder wisen gewesen / da sind denn
noch feigenbeum / ölbaum / allerley ander beu
me gewachsen / da ist dennoch milch vnd ho
nig / vnd allerley notturfft gnug gewesen / so
wachsen auch sonst ölbaum gern wo dürr
land ist / Vnd binen machen honig / wo gleich
nicht gut land / sondern sandicht dürr land ist.

**Butter von den kühen / vñ
milch von den schaffen / Sampt
dem fett von den lemmern.**

Vnd

Vnd feiste widder / vnd böcke mit fetten
nieren / vnd weitzen / Vnd trencket
ihn mit lauter drauben blut.

Da setzet er aber Poetisch verblämte
wort / wie man inn liedern vnd gesengen pfles
get / vnd wil anzeigen / das sie mit allerley leibs
narung vñ leiplichem segen / an vihe / an früch
ten / mit butter / mit lemmern / schaffen / feisten
widern / Gott vberreichlich versorget hat. Das
rans sollen wir lernen / das Gott auch solche
leipliche gaben gibt / vnd wenn er sie nicht gibt
so hilfft kein erbeit noch vleis inn Furwergken
odder scheffereien / kein vleissig haushalten /
sorge oder mühe / Wilcher Edelma oder Baw
er gedencet aber / das er solche gaben von Got
hat / odder das Gott in der ersten zeil der Ze
hen gebot da er sagt / Ich bin dein Gott / fod
dert / das man alle die selbigen güter / von ihm
erbitten vnd warten sol / odder das sie on ihnen
niemandts haben odder behalten kan. Drau
ben blut aber / nennet er hie wein / das inn den
selben lendern viel / vnd das mehrer teil rotter
wein wechsset.

Da er aber fett vñ sat ward /
ward er geil / Du bist fett vnd dick
vnd glad worden.

Vnd er hat den Gott lassen faren der
ihn gemacht hat / Er hat den fels
seins heils gering achtet.

Das

Das ist / Gott der dich aus des Königs
 Pharaonis hand erlöset hat / der dir so un-
 zelich viel gutes erzeiget hat / des hastu verges-
 sen / vnd eben dadurch vergessen / das dirs wol
 gieng / Es ist ein böse giftige art / menschl-
 ches hertzen / das es durch Göttliche wolthat /
 durch glück vnd gute tage erger wird / vnd ihe
 mehr Gott gnadet / vnd ihe grösser / trefflicher
 gaben ihm Gott gibt / sie sind leiplich oder geist-
 lich / ihe weniger es sich gegen Gott demütis-
 get / ihe weniger sichs furcht / ihe sicherer
 es wird / ihe ehr es Gottes vnd seins worts
 vergisset / ihe ehr es auff sich selbs trawet vnd
 bawet / vnd wil selbst Gott sein / Darumb war-
 net Moses inn diesem buch am .vi. Capitel so
 trewlich vnd sagt / Wenn du nu wirst haben
 grosse vnd feine stedte / die du nicht gebawet
 hast / vnd heuser alles guttes vol / die du nicht
 gefullet hast / vnd ausgehawen brunnen / die
 du nicht ausgehawen hast / vnd weinberge
 vnd ölberge / die du nicht gepflantzet hast / das
 du kanst essen vnd satt werden / so hüt dich das
 du nicht des Herrn vergessest / der dich aus
 Egypten land gefürt hat etc. Item / am .viij.
 Capitel. Der **D E X X** dein Gott fü-
 ret dich inn ein gut land / ein land da beche /
 brunnen vnd tieffen inne sind / die an den ber-
 gen / vnd inn den awen flüssen / Ein land da
 weitz / gersten / weinstöck / feigenbeum / vnd
 granat öpffel inne sind / ein land da ölbeum
 vnd honig innen ist etc. so hüt dich das du des
E Herrn



D E R D E I N S Gottes nicht vergessest /
Vnd also haben auch die Weiden gesagt / es sey
leichter vnglück zu tragen / denn glückes vnd
guter tage nicht misbrauchen / vnd zengen als
le / Es sey noch nie so ein weiser man funden /
der glückes nicht sey hochfertiger worden / Ist
aber nicht ein schendliche plag / das Gott für
alle seine vnzeliche wolthat / des von vns sol ge-
wertig sein / wie wir zu dieser zeit auch sehen.

Vnd hat ihn zu euer gerei-
tzet durch frembde / Durch die
grewel hat er ihn erzörnet.

Dis haben sie leider alzu starck erfüllet /
Denn so sie solten für so vnzeliche / leipliche vnd
geistliche wolthat danckbar sein / so furen sie
zu / fielen von Gott abe zu frembden Göttern /
sundigeten one vnterlas / mit allerley grewel
vnd Abgötterey widder die ersten Taffel / rei-
tzen Gott den Herrn zu einer vnd zorn /
bezalten ihnen für seine wolthat mit eitel vn-
gehorsam vnd vndanck / wie denn die Disto-
rien der Richter / auch die bücher der Köni-
gen / anzeigen / Denn also seine fruchtlin sein
Adams Kinder / heltet sie Gott sperlich odder
lest sie armut leiden / so murren sie widder
ihn / wie die Israeliten auch thetten / da sie
sprachen als ihnen wasser mangelt / Ist denn
Gott vnter vns oder nicht? Gibt er denn gnug /
so werden sie sicher vnd stoltz / verachten vnd
vergessen

vergessen Gottes / Darumb an Got den Herrn
 sich halten / vnd ihm hertzlich vertrauen (es
 gehe wol odder vbel) ist die höchste heilig-
 keit / die höchste kunst vnd weisheit / der edelste
 Gottes dienst auff erden / Vnd wenn die
 heuchler gleich lang mit andern Gottes diens-
 ten sind vmbgangen / so kömpt doch jmer die
 erste zeil inn den Zehen geboten vnd sagt / Ich
 bin dein Gott / du heuchler / du heiliger Baalit /
 du heiliger Papist / da hastu nie ein tittel das
 non geglaubt.

Sie haben den Feldteuf-
 feln geopffert / Vnd nicht ihrem
 Gotte.

Den Göttern die sie nicht kenneten / den
 newen die newlich kommen sind /
 Die ewer veter nicht geehret haben.

Das ist / Allerley Abgötterey der Hei-
 den / als Baal / Astaroth / Moloch / Chamos /
 Camarim etc. vñ richten allerley Gottes dienst
 an / auff den bergen vnd höhen / inn den wäl-
 den vnd hainen / von wilchen nichts im ge-
 setz geboten war / dauon ihre Veter nichts ge-
 wußt / die sie ihnen selbst erfunden vnd ertich-
 tet hatten / da sie ihrem dänckel vnd gedan-
 cken folgeten / darüber ernäch alle rechte Pro-
 pheten hefftig klagen / Also haben wir mit den
 Klöstern vnd mit der Papisten Messen auch
 gethan.

¶ ij Deinen

Deinen Fels der dich ge-
porn hat / Hastu aus der acht ge-
lassen.

Vnd hast vergessen Gottes / Der dich
gemacht hat.

Diese wort redet Moses aus grossen
mechtigem ernst / vnd aus einem hertzen / das
entbrand ist inn Göttlichem einer Gottes eh-
re / widder des Teuffels lügen / zuerretten / Als
solt er sagen / Ach / es möcht mir mein hertz
brechen fur jamer / das ich weis vnd itzund
gleich wie vor augen sehe / wie ihr den waren
lebendigen Gott / den grossen gewissen trost /
die aller festen burgk / vnd stercksten Fels inn
allen anfechtungen vnd nöten / one wilchen
ihr nicht ein augenblick fur dem Teuffel leben
odder bleiben köndtet / so leicht verlassen / vnd
so schendlichen verachten werdet / wilcher
euch doch allein / wie ein mutter ihr kind ge-
born vnd auffgezogen hat / ja das ihr des hertz-
lichen lieben vaters (der euch so veterlich mei-
net / so gnediglich fur dem Teuffel / allem vbel
behütet / vnd so reichlich mit allerley gnaden
vnd gütern vberschüttet) so schendlich ver-
gessen werdet / vnd dagegen den heilosen tod-
tengötzen anhangen / vnd allerley Abgötterey
vnd Abgötter erdencken / die euch widder ra-
then noch helfen / trösten / schützen / noch
erreten können / Das ist klagens werd.

Vnd

302

Vnd da es der **H E R R**

sah/ward er bewegt fur zorn / Vber
seine sone vnd seine tochter.

Da zeiget er an / das der zorn sol beste ge-
schwinder vnd hefftiger sein / Darumb das
so liebe sone vnd tochter / des trewen vaters
vergesen.

Vñ er sprach / ich wil mein

antlitz fur ihn verbergen / Wil sehen
wo es zu letzt mit ihm hinaus wil.

Denn es ist ein verkerete art / Es sind
kinder da kein glaub innen ist.

Das er sagt / Ich wil mein antlitz von
ihnen verbergen / redet er inn der person Got-
tes / das ist / Ich wil sie verblenden / also / das
sie mit sehenden augen nicht sehen sollen etc.
das sie sollen inn eitel blindheit vnd irthumb /
one Gott vnd Gottes erkentnis sterben vnd ver-
terben / Gott mit ihren wercken vnd Gottes
diensten suchen / vnd doch nicht finden. Denn
Gottes antzlich sehen / heist inn der schrift /
Gott erkennen / seinen willen vnd wercke se-
hen vnd mercken / Also sagt der psalm / Herr
zeige vns dein antzlit / so ist vns geholffen /
Widderumb / den ihenigen ist Gottes antlitz
verborgen die verblendet sein / das sie widder
Gott noch sein werck erkennen. Kinder aber
da kein glaub inne ist / nennet er solche heuch-
ler / die

E ij

ler / die

ler/die heilig vnd from mit allerley eusserlichen
en wercken sich stellen / vnd doch von dem
höchsten heiligsten Gottes dienst (welchen das
erst gebot foddert) gar nicht wissen noch hal-
ten wollen / wehnen sie sind die liebe kinder / so
sie vermaledeite Bastart sein / vnd Gottes
ergiste feinde.

Sie haben mich gereitzt an
dem / das nicht Gott ist / Mit ihrer
eitelkeit haben sie mich erzörnet.

Vnd ich wil sie widder reitzen an dem /
das nicht ein volck ist / An ein ner-
richten volck wil ich sie erzörnen.

Das ist / Wie sie inn der wüsten haben
ein andern Gott angenommen / das mir nicht
zu leiden war / also wil ich auch widderumb sie
verwerffen / vnd ein ander volck annemen / das
ihnen auch sol wehe gnug thun / wie denn
auch geschehen ist / wie Paulus anzeigt zun
Römern am Fülfften Cap. Da die Weiden sind
angenomen durch das Euangelion / Darumb
sind auch auff diesen tag die Jüden vber vns
auffß bitterst / vnd grimmig zornig / das wir sa-
gen / sie sein nimmer Gottes volck / sondern wir
sind Gottes volck / wie dieser Vers meldet.

Denn das feuer ist angan-
gen durch meinen zorn / Vnd wird
brennen bis inn die vntersten hell.

Vnd

33
Vnd wird verzere[n] das land mit sein
gewechs / Vnd wird anzünden die
grundfest der berge.

Fewer nennet er hie nicht allein ein leips
lich fewer / sondern die gantze schreckliche
greuliche verwüstung / die durchs schwerd
vnd fewer geschehen / da der König zu Babis
lon / vnd entlich die Römer / Jerusalem so jema
merlich / zerstöret / vertilget vnd verwüstet
haben / das im gantzen lande / vnd sonderlich
zu Jerusalem kein stein auff dem andern blies
ben / das alle köstliche gebew / zum steinhauf
fen vnd aschen gemacht / vnd das zeigt er an /
da er sagt / Vnd wird brennen bis inn die vnter
sten helle / das ist / im gantzen lande / wird von
gebew odder gewexse nichts vberiges sein
noch bleiben / sondern auch der blosser bodem
vnd die berge werden brennen / als wölt das
fewer durch die erden / inn die vntersten helle
durch fressen / Denn also gehets wenn ver
wüstung angehet .

Ich wil vnglück vber sie
heuffen / Ich wil alle meine pfeile
an ihn verschiesen.

Das selbige vnglück ist beschrieben / vnd
wie inn einem Register erzelet / im fünfften
buch Mose / am .xxviii. Cap. Vnd Moses selbst
beschreibet im nehisten Vers auch die pfeile vñ
das selb vnglück.

Sür hunger

Für hunger sollen sie ver-
schmachten / Vnd verzeret wer-
den vom fiber vnd von bitteren sen-
chen.

Ich wil der thier zeene vnter sie schicken /
Vnd wütende schlangen.

Da nennet er drey odder vier pfeile / hun-
ger / fiber / pestilentz / wilde thier / Vnd im ne-
histen Vers / setzt er krieg vnd blut vergiffen /
Vnd diese plage / sind hernach offte angezo-
gen inn den Propheten / dazu sagt er / wüten-
de schlangen / das sind die rechten staupbesen /
vnd scharffe ruthen / damit vnser **D E X X**
Gott gar manchen grossen / sichern / stoltzen
Boged vnd verechter hat hingericht / Vnd
wenn er anfehlet so gehets gar grenlich zu / da
hilfft denn nicht / das weib vñ kind elendiglich
weinen vnd heulen / klagen vnd schreien / Das
wöllen die bürger vnd barvern (so itzund Got-
tes wort / Prediger vnd Pfarrer verachten /
vnd sagen / die Pfaffen können nichts denn
die Zehen gebot predigen) erfahren.

Von aussen wird sie das
schwert berauben / Vnd inn den
kamern das schrecken.

Beide jüngling vnd jungfrawen /
Die seuglinge mit dem grawen
man.

Das ist /

364

Das ist / Krieg vnd vnglück wird vber sie
Comen / vnd wird eitel Kleinmut / schrecken vnd
bestörtzt erschrocken gemüt / bey ihnen sein.

Ich wil sagen wo sind sie?

Ich werde ihr gedechtnis auff
heben vnter den menschen.

Das ist / Ich wil ihr Königreich vnd
Priesterthumb zu bodem stossen / zu grund ver-
wüsten die oberste stad Jerusalem / Tempel vñ
Ceremonien alles in ein hauffen stossen / das /
wo zumor Königlich regiment / allerley feine
ordnung / opffer vñ herliche Feste gewesen /
gantz sol wüste vnd still werden / das iderman
mag sagen / wo ist nu der Jüden Königreich?
wo ist ihr Priesterthumb? wo sind ihr herli-
chen Feste vnd opffere? Das ist alles war wor-
den / wie Hieremias der Prophet jemmerlich
beweinet vnd klaget / so gibts auch die erfa-
rung auff den heutigen tag / das / ob wol noch
ein hand vol Jüden verhanden / das doch ihr
regiment / vnd alle ihr Gottes dienst zugrund
zurissen sein / das sie kein eigen Königreich noch
Priesterthumb haben / wie andere völker /
Vnd ihr gedechtnis ist auffgehoben vnter den
menschen / Das ist / sie sind allenthalben ver-
achte arme leute / die keinen namen noch anse-
hen mehr haben / das sie etwas weren / odder
vermöchten / sondern sind eitel fustücher ges-
gen dem / das sie zumor oben geschwebt / vnd

§ das

Das heupt gewest sind / Das dieses nu Gott
vermüge vnd thun könne / nemlich / ein gantz
gros herlich wesen / als eins gantzen König-
reichs pracht vnd namen öde wüste / vnd inn
eil stille zu machen / des rhümet er sich wol im
ersten gebot / da er sagt / Ich bin Gott etc. aber
man gleubts nicht / Der Babst vnd die Pa-
pisten / hetten vor funffzehen odder Sechzes-
hen jaren auch nicht gemeint / das so viel gros-
ser Stifft vnd Klöster / da ihre Gottes dien-
ste so herlich giengen / solten wüste werden /
vmb ihrer gewel willen / Aber Gottes gericht
vnd werck stehen vor augen.

Wenn ich nicht den zorn

der feinde schewete / Das nicht ihre
feinde stoltz würden.

Vnd möchten sagen / vnser hand ist
hoch / Vnd der **HE** hat nicht
solchs alles gethan.

Das redet er darümb / Denn er hat offte
sein zorn auffgezogen / vnd hat auch die Gott-
losen erlöset / vnd von den feinden errettet / das
hat er aber gethan vmb seins namens willen /
das sein name nicht gelestert würde / von den
vmblicgenden Heiden / Darümb hebt er mit
diesem Vers auff der Juden rhum vnd stoltz /
da sie vielleicht möchten sagen / Wir sind nicht
so böse gewesen wie Moses singet / Denn Gott
hat vns offte durch wunderzeichen erlöset /
Den selben antwortet er / vnd sagt / es ist
nicht

365

nicht vmb ewers verdienstis willen geschehen/
Denn ihr hettet die ohgedachten straffe wol
alzeit verdienet/aber so ich euch hatte zu einem
volck angenommen / so hab ich meins namens
müssen verschonen / ob ihr wol verzweinelte/
vnglenbige buben waret / Aber ich wil den
noch nicht ewig so zu sehen noch schonen /
sondern es sol zu letzt ewer ende komen/wie ihr
verdienet habt.

Denn es ist ein volck da
kein radt inn ist / Vnd ist kein ver-
stand inn ihnen.

Das ist/Sie kennen widder Gott noch
seine werck/sie rühmen/ich sey ihr Gott/vnd
kennen mich nicht / geben inn ihrer blind-
heit sicher dahin / mit ihrer heucheley / vnd
treiben one vnterlas allerley Abgötterey/wid-
der das erst höchste gebot / sind vermessen
vñ sicher /wöllen wehnen / sie sein liebe kinder/
vnd ihr sache stehe wol bey mir / so doch mein
grimmiger zorn bald sol vber sie ausgegossen
werden/Darumb dencken sie nicht ein mal
dran/das sie sich bekereten odder besserten.

O das sie weise weren vnd
vernemen solches / Das sie verstün-
den / was ihn hernach beegen
wird.

S ij Als

Als solt er sagen / Ich hab so lang ihnen
geprediget / itzund hab ich sie gnug vermanet /
das sie (wie das erst gebot laut) den einigen
Gott allein fürchten vnd lieben solten / vnd
auff ihnen vertrauen / vnd von ihm nicht
weichen. Die Propheten nach dieser zeit /
werden auch nichts anders treiben / denn das
die fürcht Gottes vnd der glaube gegen Gott /
der höchste Gottesdienst sey / Wolt Gott /
weñ solche predigte gehen / sie weren den weise /
verachtens nicht vnd erkennenen / das ihr tod
vnd leben / ihr gedeien vnd verderben / ihr se-
ligkeit vnd verdammis / ihnen dran gelegen ist /
Aber ich weis / sie werden inn sicherheit vnd
Abgötterey geraten / Nñ wie sie mir haben viel
hertzleid gemacht inn der wüsten / also werden
sie die künfftigen Propheten auch in den wind
predigen lassen / nichts desteweniger ihren Ab-
göttereien nachlauffen / bis so lange Sennas-
herib / vnd Salmanasser / Item / Nebucad /
Nezar der König zu Babel / komen / vnd ent-
lich die Römer / vnd lernen sie die Zehen gebot
verstehen / nemlich / das Gott ist ein eueriger
starcker Gott / der entlich vnglauben vnd Got-
los wesen nicht vngestraftt lesset / Also sagt
Salomon auch inn sprächen / am ersten Cap.
Gottes weisheit lies sich hören auff den gas-
sen / sie recket ihr hand aus / vnd niemand ach-
tet drauff / so wil ich auch lachen (sagt Gott)
inn ewrem vnfall vnd ewer spotten / wenn da
kômpt das ihr fürchtet / wenn vber euch
kômpt.

366
Kömpt wie ein sturm / das ihr furcht / vnd ewer
vnfal als ein wetter / wenn vber euch angst vnd
not kömpt / also da der Herr Christus die stad
Jerusalem mit erbarmen ansah / vnd vber sie
weinet / da er selbst / hernach auch die Aposteln /
das Jüdisch volck zur besserung vermaneten
vnd sie vor ihrem grossen vnfal warneten /
waren gar wenig weise / die es zu hertzen na-
men / hatte niemands achtung drauff / was
noch ihrem predigen odder hertzlichen klä-
gen vnd weinen folgen würde / aber hernach
ein kurtze zeit / erfuren sie es allzu starck.

Wie gebets zu / das einer
wird ihr tausent jagen / Vnd zween
werden zehen tausent flüchtig ma-
chen.

Ist nicht also / das sie ihr Fels ver-
kauft hat? Vnd der **D R X X**
hat sie vbergeben.

Das ist / Wenn es ein mal zur straffe ko-
men wird / wird ihnen hertz vnd mut entpfal-
len / so werden sie nicht allein aus der Prophe-
ten Worten hören / sondern mit dem werck er-
faren / das es aus mit ihnen ist / das sie Gott
verlassen hat / vnd also ist es auch gangen / Da
der König von Babel / wie ein schrecklich wet-
ter sie vberfiel / da die Römer Jerusalem inn
grund verstedeten / das ein Weide tausent Jü-
den schrecket / vnd inn die flucht schlug / vnd
F ij das

Das auff der Jüden seiten nichts denn zagen/
schrecken/zittern/beben vnd verzweiteln war/
so doch zuvor/da Gott noch bey ihnen war/
ein Jude tausent Heiden schrecket / vnd aller
glückseliger sieg auff ihrer seiten war. Geni. xxvi.
Also dieser zeit/wird man nicht ehr glauben/
was vor ein starcke macht Gottes beistand ist/
bis das er die hand abthut/vnd vns versuchen
lest / was stercke / vermügen / hertz odder mut-
tes/wir von vns selber haben.

Denn vnser Fels ist nicht
wie ihr Fels / Des sind vnser feind-
de selbs richter.

Das ist/da ewer Gott/ewer grosser ges-
wiffer starcker schutz bey euch hilt/ da hattet
ihr gut thun/da war ein König der Heiden
euch wie ein flige /da galt es gleich/mit grosser
oder kleiner rüstung den feinden begeben/ denn
Got war bey euch /der nicht allein ros vñ man/
sondern auch alle hertzen vñ gedancken der feind-
de inn der hand hat / **Denn vnser fels ist nicht**
wie ihr fels /das ist/wir haben wol ein andern
Herrn vnd Gott denn die Heiden/ die Hei-
den haben sylbern vnd gülden götzen/haben
viel reichthümer vnd macht / aber vnser Gott
hats alles inn der hand / vnd kan niemands
ein schwerd stortzen /ja niemands euch sawer
ansehen/odder ein bösen gedancken haben / er
wolle es denn / **Das alles haben die Heiden**
selbst

selbst müssen bekennen / das dem volck Israel
 mit gewalt odder macht / niemands kondte
 anhaben odder abbrechen / so lange ihr Gott
 bey ihnen hilde / Darumb gab auch Bileam
 dem König Moab ein rath / das er das volck
 erst solte zu sunden reitzen / das ihr Gott von
 ihnen liesse / vnd er also obfigen mochte / So ist
 nu Bileam einer von den zeugen / die da zeu-
 gen müssen / das Israels Gott / ein starcker
 Fels vnd vnüberwindlicher Gott sey / so sind
 die Egypter auch zeugen / die da sagten im an-
 dern buch Mose am vierzehnen Cap. Last vns
 Israel fliehen / denn Gott streitet vor sie / So
 sind auch zeugen die Philister im ersten buch
 der Königen / am funfften Cap. Darumb has-
 ben keine Götter so hart bey ihrem volck ge-
 halten / oder ihren gewalt beweiset / als der wa-
 re lebendig Gott inn Israel / Also sagt er hiero-
 ben im dritten Capitel. Fürchtet euch nicht vor
 ihnen / denn der Herr ewer Gott streit für
 euch.

Denn ihr weinstock ist des
 weinstocks zu Sodom / Vnd von
 dem acker Gomorra.

Ihre beer ist ein gall beere / Sie haben
 bittere dranben.

Das ist / Sie solten wol ein feiner lästiger
 weinberg sein / den Gott selbst gepflantzet hat /
 darinne viel fruchtbarer weinstöcke nach aller
 lust.



lust stunden / sie solten wol ein fein Gotts
fürchtig danckbar volck sein / da viel viel glau-
biger / fromer kinder vnter weren / die Gottes
wort von hertzen lieb hetten / andere leut auch
erzu brechten / vnd viel frucht trugen / so sind
es eitel distel vnd dörnen / eitel wilde drauben /
eitel miswachs / faule vertorbene beer / vñ eitel
solche feine fruchtlin / wie Sodoma vnd Go-
morra / Es solte eitel köstlicher / reiner / krefftis-
ger most vnd guter wein / vnter ihnen funden
werden / so ist es eitel laur / ja eitel gift vnd
galle allerley falscher lere / vnd selbertichte Ab-
göttischer Gottes dienste / Also haben die an-
dern Propheten solche gleichnis aus Mose ge-
nomen / als da Esaias am funfften Cap. sagt /
Er wartet das sein weinberg drauben brecht /
aber er bracht wilde drauben / Vnd der .lxxix.
Psalm / vergleicht auch das gantz volck einem
weinberge / wilchen die wilden sewe zurwü-
len etc. Dis hefftige harte wort / redet er aus
gantz hitzigem einer vnd grossen ernst / widder
die falsche lere / vnd falschen Gottes dienste.

Ihr wein ist trachen grim
Vnd wütiger ottern gall.

Diesen feinen titel (da er es abermal aus
grossen hefftigen zorn vnd einer drachen
grim / gift vnd galle nennet) gibt er ihrer fal-
schen lere / dadurch allerley greulicher irthumb
ward eingefüret / vnd die rechte lare vom glau-
ben der

ben der waren Propheten vnterdrückt / Denn
 es ist kein schedlichere vnd ergere giff / vnter
 der sonnen / denn falsche lere / welche mördlich
 vnsaglichen schaden thut / vnd die leute one
 vnterlas weiter von Gott füret / zu eitel greuel
 vnd eitel Gottes lesterung / Solche giff vnd
 gall / war der Gottesdienst Baal / zu des Pro
 pheten Delias zeiten / solche giff vnd gall /
 waren auch die kelber Samarie / vnd alle Got
 tesdienste auff den höhen etc / noch hieng das
 volck / die König vnd Fürsten den selbigen an /
 höreten die falschen Propheten / verfolgeten
 vnd erwürgeten die fromen Propheten / Sol
 che giff sein vnter dem Papstumb souiel vn
 zeliche Gottlose lere gewesen / Die lere von der
 Messen / vnd vom opere operato / Vom fegfew
 er / Von klostergelübden / Von dem ehelosen
 stand etc / welche schrecklichen vnd vnaus
 sprechlichen schaden gethan / noch wird das
 alles durch den Teuffel vnd seine Apostel / eitel
 heilig opffer / heilige Göttliche andacht / vnd
 Gottesdienst gerhümet / so es hie der heilig
 geist durch Mosen schedliche giff vnd gall nen
 net / Vnd Paulus der Apostel sagt auch / solch
 falsche lere sey Teuffelische lere / vnd fresse
 vmb sich wie der Krebs.

**Ist solchs nicht bey mir ver
 borgen? Vnd versigelt inn meinen
 schetzen?**

G Das



Das ist / Walts nicht dafur / das ich ein
Gott sey wie Baal / der nicht sehe noch höre /
fur dem ihr euch kond entlich decken odder
verbergen / Ich weis vnd sehe allen gewel /
alle ewre wandel vnd wercke / die ihr treibet /
allein vmb meines namens willen schone ich
noch / aber geborget sol es euch sein / vnd nicht
geschenckt / Ob ihr wol nicht sehet aus blind-
heit vnd sicherheit / was fur ein straffe vber
euch im himel beschlossen ist / vnd wie das erst
gebot sol / vnd mus war bleiben / so habe ich
doch alle Register ewerer gewel / ewer vnd anck-
barkeit / ewer verachtung / bey mir verborgen
Vnd darff es ihm keiner in sin nemen / das ein
verechter odder Gottloser solt vngestraftt blei-
ben / Dis ist widder sicherheit gered / das sie
nicht gedenccken / dieweil ihnen Gott / geld /
gütter / ecker vnd wisen gibt / das sie darumb
mit Gott wol stehen / vnd alle sache gut sey /
Denn leibliche güter gibt er auch den Weiden /
sondern das sie bedenccken was sie wol vor
straffe verdienet haben / wie das erst gebot sol
war bleiben / als es nicht kan falsch sein / nach
dem Gott dem Herrn / sein Göttliche Maie-
stet / ehr / preis vnd gantz Gottheit dran gele-
gen ist / Denn es darff niemands gedenccken /
das er darumb ein gnedigen Gott habe / wenn
er ihm leipliche güter gibt / haus / hoff / weib /
Kind / ecker / wisen / denn da saget der xxxviij.
Psalm / vnd alle schrift / das die Gottlosen inn
der welt / am reichsten vnd glücklichsten sein /
sondern

sondern / eben wenn solcher zeitlicher leiplicher
 seggen vorhanden ist / so sehe man am ersten
 drauff / was Gott im heimlichen Register hat /
 Aber das kan kein Gottloser thun / sondern ge-
 hen inn eitel blindheit vnd sicherheit dahin /
 also itzund Adel / bawern / vnd bürger etc /
 das sie vieller bürden entlediget sein / des Ab-
 las / des bannes / der geld Messen / der Statio-
 nierer / der bettel Mönche etc / durch wilches ih-
 nē vber das geistlich heil der gewissen / ierlich /
 mercklich an ihr narung zugehet / dadurch sie
 manchen gülden inne behalten / meinen so Gott
 ihnen die leiplichen narung mehret / sie haben
 ein gnedigen Gott / gehen hin inn eitel sicher-
 heit / verachten nu auch auff's enfferst Gottes
 wort / vnd die prediger die es trewlich meinen /
 wissen aber nicht / was Gott im register hat /
 vnd das er solcher sunde schreckliche straffe
 sparet bis zu seiner zeit.

Die rache ist mein / ich wil
 vergelten / Zu seiner zeit sol ihr fuss
 gleitten.

Denn die zeit ihres vnfalls ist nah / Vñ
 ihr künfftiges eilet erzu.

Inn diesem wort / das Gott hie durch
 Mosen sagt / Die rache ist mein / wird abermal
 gerhümet von dem ersten gebotte / das es sol
 war bleiben / vnd kein Gottloser sol der rache
 odder straffe entpfliehen / Also redet diesen wor-
 ten Mose:

G ij ten Mose



ten Mose nach der xliij Psalm / Herr Gott
des die rache ist / Gott des die rache ist / erschei-
ne / Erhebe dich du richter auff erden / Wie
lange sollen die Gottlosen trotzen / Mein (sagt
er) ist die rache / als solt er sagen / ob ich ein zeit-
lang schon / vnd die straffe auffziehe / vmb
meins namens willen / so sol ewer greuel doch
nicht vngestraft bleiben / ob ihr wol itzund
inn einem guten land wonet / ecker vnd wisen /
weingarten / vnd allerley fruchte / reichlich
habt / vnd also / wie inn einer mommerey oder
laruen einher gehet / als seid ihr liebe Gottes
kinder / so ist doch die rache mein / Vnd meiner
hand / wenn die ein mal gehen wird / sol nie-
mands weren / wenn ihr am sichersten seid / so
wil ich mich sehen lassen / das mein name sey
Herr / Also ist's ihnen auch widderfaren / die
straffe ward auffgezogen / bis da das stündlin
kam / an welchem die Römer / das gar aus mit
ihnen spileten / vnd sie auff ein mal da heim-
sucheten / wie sie wol lang zuuor verdienet hat-
ten / Vnd also ist ihr fuß geglitten / das sie nu
widder Königreich noch Priesterthumb ha-
ben / Vnd also sihestu das Moses prophezeit /
das ein mal das volck / mit Königreich vnd
Priesterthumb sol ein ende haben. Die guten
gesellen so itzund das Euangelium so schend-
lich verachten vnd vbel misbrauchen / werden
ar. herfaren / das Gottes die rache ist.

Denn

Denn der HERR wird sein

volck richten / Vnd vber seine knecht wird
er sich rewen lassen.

Denn er wird ansehen / das ihr krafft dahin
ist / Vnd aus ist auch mit dem der ver-
schlossen vnd vbrig war.

Das ist / Inn dieser sache da es seine ehre belan-
get / wird er auch seines eigenen volcks nicht scho-
nen / vnd wird nicht ansehen den herlichen namen
vnd rhum / das sie Israel / das sie Gottes volck / vnd
Gottes erbe heissen / das sie liebe kinder heissen / son-
dern des ersten gebots vrteil / das da heist / er sucht
dabeim die missethat der Väter / vber die kinderet c /
wird sie treffen / vnd da sol nichts fur helfen / Gne-
dig wird er aber sein / wie der ander teil des er-
sten gebots lantet / Vnd barmhertzigkeit thun one
alles ansehen der person / den jhenigen die ihn von
hertzen fürchten vnd lieben / vnd seine gebot halten /
Vnd hie prophezeiet Moses / das der vberige kleine
hauff Israels / so sich zu Christo bekeren wird / sol
erhalten werden / Sonst heists also / Ihr krafft sol
gar vnd gantz aus sein / auch mit dem / der heim-
lich verschlossen vnd vbrig war / das ist / es sol vom
Königreiche Israel / vnd entlich vom gantzen volck /
wenig odder nichts vberbleiben / alle sollen sie vnter
die Heiden / in jamer vnd elende zurstrawet werden.

Vnd man wird sagen / wo sind

ihre Götter? Ihr fels darauff sie ver-
traweten?

D **Mit**

Mit allen Gottlosen vñ solchen Heuchlern / welche heiligkeit vnd Gottes dienst fur geben / one Gottes furcht vnd glauben / one den höchsten Gottes dienst der ersten Taffeln / leffet es Gott entlich dahin komen / das ihnen ihr eigen gewissen widerspricht / vnd ihr spottet / das sie inn ihren grossen engsten dencken / Wo bleiben wir nu? Wo ist nu vnser Gott? Denn dieweil es wol gehet / sind alle heuchler gantz sicher / meinen sie stehen mit Gott sehr wol / dencken nicht anders / es gehe ihnen darumb so wol / das sie so heilig sein / Wenn aber widderwertigkeit kömpt / so werden sie verzagt / vnd sagt ihnen denn ihr eigen hertz vnd gewissen also / Was helffen vns nu vnser gute wercke / vnser arbeit vnd mühe etc? War ist es / der Teuffel wolte ein solches bitter wort / den rechten Christen vnd gläubigen auch gern ins hertz reden / Wo ist nu ewer Gott / wie der xliij. Psalm anzeigt / Aber der ware Gott / helt fest vber seinem ersten gebot / vnd wenn es auff's höchste oder zu den rechten zögen vñ nöten kömpt / bleibt er entlich nicht aussen / er sagt bald / wie still er schweiget / Die bin ich / Vnd ihe lenger er verzeucht / ihe reichlicher er tröstet / Aber falscher Abgöttischer trost / der bleibt aussen / vnd die falschen Götter / lassen ihre anbeter schweben vnd sincken / da sehen vnd mercken sie denn erst was sie inn ihrer sicherheit gewesen sein / was sie geglaubt haben / wie ein feinen Gott sie haben / Das meint er / man wird sagen / Wo sind ewer Götter?

Don welcher opffer sie fett assen / vnd trancken den wein ihrs tranckopffers.

Kast

Laß sie auffstehen vnd euch helffen / Vnd
euch schützen.

Sie lassen sich däncken sie sein seer heilig / vnd
essen nicht Götzenopffer / sondern ihre opffer gefals
len dem waren rechten Gott / Also haben die Papis
sten gethan / mit dem grossen misbrauch der Mess
sen / Also rühmet der Türck / wilcher sein Mahoz
meth vber / vnd neben Christum setzt / er diene auch
Gotte / vnd habe vnter seinem volck grossen Gottes
dienst / Aber dieweil er nicht Christum erkent / vnd
an den waren Gott nicht gienbet / ist alle sein Got
tes dienst ein grewel / Vnd man wird ihm auch sa
gen / Wo sind nu ihre Götter / wo ist nu ihr Mahoz
met ? Vnd nehift da er fur Wien inn Osterreich geles
gen ist / hat mans wol sagen mügen / da ihm inn die
sechtzig odder achtzig tausent menschen / an der Pe
stilentz gestorben sind / vnd da ein solch verzagen inn
sein volck komen / das er hat müssen abziehen / vnd
des waren lebendigen Gottes vnd vnsers Weilandts
Ihesu Christi / hand vnd macht / öffentlich sehen
vnd erfahren.

Sehet ihr nu / Das ich Ich bin /

Vnd ist kein Gott neben mir.

Ich kan tödten vnd lebendig machen / Was
ich zuschlagen hab das kan ich heilen / Vñ
ist niemand ders aus meiner hand erredte.

Das ist der Gottlosen vnd aller heuchler art / das
sie heiligkeit furgeben / mit vielen eusserlichen Got
tes diensten / als achten sie gros auff Gott / vnd le
ben doch inn aller sicherheit / verachten alle gebot

D ij Gottes

Gottes /sonderlich das erste gebot /als sey kein Gott /
als sein die Zehen gebot ein. trawm / Darumb wo
Gott der Herr sein Gottheit sol erhalten / so mus er
entlich durch erfahrung / sie solches finden vnd erfa-
ren lassen / Sonst sprechen sie jmer (wie der Psalm
sagt / inn der person der Gottlosen) Solt dauon
Gott etwas wissen? Darumb mus er durch die er-
fahrung beweisen / das er Gott sey / das also die ver-
echter entlich bekennen müssen / er lebe vnd hersche
noch / wenn sie ihn lang verachtet haben.

Denn ich wil meine hand inn
den himel heben / Vnd wil sagen / Ich
lebe ewiglich.

Dieses ist aber ein starcke bekräftigung / da
Gott der Herr durch sich selbst schweret / das die
erste Taffel vnd das erste gebot sol war bleiben / Vnd
dieser eid / da Gott / so er kein grossern vber sich hat /
bey sich selbst schweret / wird hie ausgedruckt zu
trost den gleubigen vnd waren Israeliten / vnd zum
schrecken den verechtern vnd Gottlosen / Den dieser
starcker eid / vnd solcher herlicher trotz vnd rhum /
zeigt an / das Gott allein ein gewisses / ewiges vnend-
lichs leben / vnd vnendliche macht vnd gewalt hat /
Alle vnser leben vnd wesen / thun vnd vermügen
ist vngewis / vergenglich / Alhie wird nu Got-
tes ewige macht / die niemands hindern kan / ge-
rhümet / wie man sagt / Richten / Rhümen / Res-
chen / die drey .R. gehören Gott allein / Wir sollen
von vns selbst vns nichts vnterstehen / noch von vns
etwas rhümen / Also sagt der .lxij. Psalm. Gottes ist
die macht. Wenn

Wenn ich den blitz meines Schwerds
wetzen werde / Und meine hand das gericht an
greiffen wird .

So wil ich mich widder rechen an meinen feind-
den / Und denen die mich hassen / vergelten.

Das ist das wort so im ersten gebot stehet /
das Ich Gott daheim suche die missethat der Väter /
vber die Kinder in das dritte vnd vierde geschlecht etc.
Das wil ich war machen vnd behalten / nicht allein
an euch meinem volck Israel / sondern inn allen Rō-
nigreichen der Heiden / Und braucht eben der worte
des ersten gebots / denen die mich hassen etc / Das
er aber sagt / den blitz meines Schwerds / wil er anzei-
gen / das Gottes straffe vnd rache / solle gros vnd
schrecklich sein / die da widder alle Gottlosen / wider
alle verechter Göttlicher gebot / sie sind gleich Jū-
den odder Heiden / wenn das stündlin kömpt / hin-
durch reissen vnd dringen sol / wie ein blitz vnd star-
cker plötzlicher donnerschlag / der nicht zu hindern /
dem nicht zu weren ist.

Ich wil meine pfeil mit blut trun-
cken machen / Und mein schwerd sol fleisch
fressen.

Vber dem blut der erschlagenen vnd vber dem ges-
fengnis / Und das des feinds heupt entblösset
sein wird .

Meine straff vnd greuliche rache / wil ich also
machen / das / ob ich wol den zorn habe auffgezō-
gen / doch auff's letzt gantz erbermlich sol zugehen /
Das aber Moses inn der person Gottes sagt / Meine

D iij

pfeil sollen vol. bluts sein / mein schwert sol fleisch
fressen / redet er aber auff der Hebreischē sprach art /
wil aber sagen / wenn der zorn angehet / wil ich plötz
lich ihren ergesten feinden raum lassen / Krieg / jamer
vnd vnglück vber sie / wie ein starcken grossen strom
gehen lassen / vnd ein blutuergrissen anrichten / das
da sol kein erbarmen noch schonen sein / Dis alles
ist auch warlich mit den Jüden also gangen / da der
König zu Babel Nebucad Nesar / da ernach die
Römer die stad Jerusalem verwüsteten / das / wie Jo
sephus schreibt / tod bliebē / eilffmal hundert tausent /
durch hunger vnd schwert / Das er aber sagt / das
heupt des feinds sol entblosset werden / das ist / mein
vngheorsam volck / meine feinde sollen ihrs Königs
reichs beraubt werdē / sol alles mit ihnen ein ende ha
ben. Wir sehē zu vnser zeit auch öffentlich / das Gott
durch allerley zeichen seinen zorn drawet / mit dem
aller schrecklichsten feinde dem Türcken / so hat er lei
der viel Christlichs bluts vergossen / aber es sind we
nig / die dem Göttlichen zorn mit ernstem gebet ent
gegen giengen.

Jauchzet ihr Heiden mit sein
volck / Denn er wird das blut seiner knecht rechē.
Vnd wird sich an seinen feinden rechen / Vnd sich
versünen lassen dem land seines volcks.

Das ist / Ob er wol sein volck hart straffen wird
vmb ihrer sünde willen / so werdet doch ihr Heiden
euch noch freuen mit seinem volck / der reichen
gnade des segens / vnd verheissung teilhafftig wer
den / Denn es wird noch ein heuff sin vberbleiben /
das recht Israel ist / recht Gottsförchtig vnd glau
big / als

big / als die Propheten / Aposteln vnd ihre Jünger /
 Inn den selbigen wird er nichts deste weniger (wenn
 solcher grosser sturm vnd wetter / solchs schrecklichs
 zorns / furvber ist) dennoch alle selige verheissung
 der gnaden erfüllen / vnd durch sie / aus den steinen /
 das ist / aus den Abgöttischen Weiden / heilige Abra
 hams samen vnd kinder machen. Vnd wird das
 blut seiner knechte rechen / das ist / aller fromen Pro
 pheten blut / vnd erlach der Aposteln / vnd alles vn
 schuldig blut / so dieses volck (ihr falsche Abgötti
 sche Gottes dienst zuerhalten) manchfeltig vergies
 sen wird / wird Gott schrecklich rechen / von Dabels
 blut an / bis auff den letzten vnschuldigen bluts
 tropffen der vergossen wird. Vñ wird doch gnedig
 sein dem lande seines volcks / das ist / dem vberigen
 hauffen der Israeliten / die da glauben werden /
 dem wird Gott ein new vnd ewiges reich / auff dem
 stuel David / vnd im haus Israel / erwecken / wel
 chs kein ende haben wird / da der Herr vnd
 König sein wird / der Herr Christus / welchs
 nu durchs Euangelium offenbaret ist /
 dem sey lob vnd preis inn ewig
 keit / **A M E N.**

Ende des lieds Mose.

Gedruckt zu Wittenberg durch
 Georgen Rhaw.

Faint, illegible text, likely bleed-through from the reverse side of the page. The text is arranged in several lines and is significantly faded.

des liebes Adolphi
zu ...
...




Rom. Dg 1953


(X 220 6300)



89.







Auslegung
 D. Mart. Luthers/
 vber das Lied Mose
 am Zwey vnd Dreissigsten
 Cap. Dentero. Vordend-
 schet aus dem La-
 tin / durch
Iustum Jonam.
 Gedrückt zu Wittemberg
 im M. D. XXXII.



Handwritten signature or mark in black ink.

